

## ANNOTATIO.

**D**iversus est noster Joannes ab altero Joanne S. R. E. Diacono, qui à Sigeberto in Catal. cap. 106. laudatur, & Anastasio S. R. E. Bibliothecario familiaris fuit, qui etiam sub anno 874. Libros quatuor de Vita S. Gregorii Magni Papæ edidit, gestaque Clementis Papæ scripsit, quæ MSS. habentur in Casin. Biblioth. Vide Vossium de hist. Lat. in Joanne Diacono, malèque propterea nonnulli opuscula eorum confundunt inter se, dum ex duobus unum faciunt.

## CAPUT XXXIX.

## DE PETRO.

**P**etrus Diaconus institutor meus declamator insignis, è Civitate Theanensi, de qua oriundus erat, egrediens, Casinum advēnit, abque Oderisio Abbate Monachus factus est. Scripsit præterea in eodem Cœnobio positus, sermonem de Septuagesima: de Dedicatione Ecclesiæ: de Nativitate Domini: de Epiphania, & alios quamplurimos.

*Claruit circa annum Domini MLXXX.*

## CAPUT XL.

## DE LANDENULPHO.

**L**andenulphus parvulus in Casino sub Desiderio Abbate Beato Benedicto oblatus: ac in divinis scripturis plenissimè doctus, & in earum sensibus subtilissima exercitatione limatus, de renovatione Casinensis Cœnobii, seu Archisterii, ac regimine Desiderii versus mirificos fecit, quos idem Desiderius Abbas in circuitu Capituli, & Claustrii describi præcepit.

*Vivebat Anno MLX.*

## CAPUT XLI.

## DE GUIDONE.

**G**uido Casinensis Presbyter, vir in humana eruditione clarissimus, religione, & vita probatissimus, scripsit historiam Henrici Imperatoris, visionem Alberici Monachi Casinensis; versus de fortuna ejusdem . . . . præterea quæ in historia Casinensi deerant, à temporibus scilicet Oderisii primi usque ad hunc diem, adjunxit.

## ANNOTATIO.

**V**ivebat Guido tempore Girardi Abbatis Casinensis anno Domini 1111. inter elegantissimos scriptores sua tempestate præcipuus. Visio Alberici, de qua supra in Alberico Diacon. Cardin. penes nos extat MS. tali lemmate: *Quia nonnulli veritatem mendacio obumbrare consueverunt. Summatim verò descripta à nostro Petro legitur in Chron. Casin. lib. 4. cap. 68. edit. Venetæ his verbis: Hujus tempore (idest Girardi Abbatis, qui fedit ab anno 1111. usque ad 1123.) in Campania provincia insigni miraculum & antiquis per omnia simile contigit. Namque in castro Sanctorum septem Fratrum, Albericus quidam nobilis puer cum decimum ageret ætatis annum, morbo correptus ad extrema perductus est. Quo tempore diebus novem, & totidem noctibus immobilis, ac sine sensu quasi mortuus jacuit; hoc autem intervallo à Beato Petro Apostolo, duobusque Angelis per loca pœnarum deductus ad infernale barathrum devēnit. Demum ad Paradisum amœna delatus, vidit Sanctorum mansiones, atque in Cœlum sublevatus æreum, & à Beato Petro Apostolo sufficienter edoctus de veteri testamento, de peccatorum pœnis, gloriaque Sanctorum, vidit arcana quedam, quæ loqui prohibitus est: sicque per septuaginta duas provincias ab eodem Apostolo deductus, vitæ redditus est. Hujus visionem qui cupit agnoscere, à Guidone hujus Monasterii Monacho descriptam, legat. Nos eam, quia per ora omnium vertitur, hic scribere omisimus. Ex hinc Albericus ipse, relicto seculi pompis, Casinense Cœnobium petiit, atque à Patre Girardo gratissimo affectu susceptus, accepto sanctæ conversationis habitu, Christo Regi militiam professus. Tanta verò (hodieque) abstinentia, tanta pollet gravitate morum, ut & peccatorum inspexisse pœnas, & Sanctorum gloriam vidisse nemo est qui dubitet. Nam ex illo tempore neque carnes aliquando gustavit, neque vinum bibit: nudisque semper incessit pedibus: atque in hac afflictione corporis, cordisque contritione, & humilitate nunc usque (anno 1115.) in Casinensi hoc Monasterio permanet, ut multa illa, quæ alios lateant, vel metuenda, vel desideranda vidisse, etiamsi lingua taceat, vitæ loquatur. Hucusque Petrus. Historia Henrici nescio quo infortunio nondum lucem viderit, dum hi, qui de rebus Henrici IV. & V. conscripserunt, de Guidone silentium altum habuerunt.*

## CAPUT XLII.

## DE ROBOA.

**R**oboas Diaconus, parvulus in Casino à Girardo Abbate susceptus, scripsit rogatu quorundam amicorum suorum sermones de totius anni festivitatis, ac Vitam S. Confessoris Christi Leonardi.

*Claruit Roboas, sive Roboas Anno MCXX.*